

T3041/0251

CM 0 1 2 3 4 5 6 7 8 9 10 11 12 13 14 15 16 17

Lab D50 2°

95/0/2

81/0/0

66/0/0

51/0/1

35/0/0

20/0/0

29/19/-54

55/-39/33

42/57/29

82/4/79

51/50/-13

50/-28/-29

38/14/16

66/16/18

50/-5/-22

43/-14/21

55/-9/-25

71/-32/0

62/34/60

40/9/-43

52/48/17


31/21/-21

72/-23/57

73/19/68

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

CHURCH OF THE
SACRAMENT
SAN FRANCISCO
MAY 10 1881



哈佛大學漢和
圖書館珍藏印

名言

游之樂所玩無故人之游也觀其所見我之游也觀其所變壺丘子曰
凡所見亦恒見其變故務外游不如務內觀外游者求備於物內觀者
取足於身於是列子自以爲不知游列子

禹本紀言河出崑崙崑崙其高二千五百餘里日月所相隱避爲光明
也其上有醴泉瑤池今自張騫使大夏之後也窮河源惡觀本紀所謂
崑崙者乎史記

君厭承明之廬勞侍從之事懷故土出爲郡吏會稽東接于海南近諸
越北枕大江間者閩焉久不聞問漢武帝賜嚴助書

固今年五十有七鬢髮已白所謂容身而游滿腹而去周觀天下獨未
見益州耳昔嚴夫子嘗言經有五涉其四州有九游其八欲類此子矣

李固與
弟固書

仲長統常欲卜居清曠以樂其志曰濯清水追涼風釣遊鯉弋高鴻不
受當世之貴求保性命之期則可以凌雲霄出宇宙之外矣

存名山已

德山名

熊成七刊

余南登廬山觀禹疏九江遂至于會稽太滄上姑蘇望五湖東闕洛汭
大邳遡河行淮泗濟漯洛渠西瞻蜀之岷山及離堆北自龍門至于朔
方曰甚哉水之爲利害也史記

夫何事於冀州聊託公以游居歷九土而觀風亦哲人之所虞遂發軔
於京洛臨孟津而北厲想尚甫之威虞號蒼兕而明誓既中流而嘆息
享烏魚之瑞命瞻淇澳之園林善綠竹之猗猗望常山之峩峩登北岳
而高游嘉孝武之乾乾親飭躬於伯姬建封禪於岱宗瘞玄王於此丘
徧五岳與四瀆觀滄海以周流且休精於敝邑聊卒歲以須臾班彪遊
余諱離騷天問哀郢悲其志適長沙觀屈原所自沉淵未嘗不垂涕想
見其爲人。史記

行遊目以南望覽太室之威靈顧大河于北垠觀洛汭之始并牽陵阿
以登降赴偃師而精勤壯田橫之奉首義二士之夾墳蔡邕述行賦

馮子以大人之德不碌碌如玉砾砾如石風興雲蒸一龍一蛇合道翺
翔與時變化夫豈守一節哉上隴阪騰高岡遊精宇宙流日八紘眇然
有思凌雲之意乃作賦以自廣曰開歲發春百卉含英甲子之朝兮汨

吾西征發軔新豐兮徘徊鎬京凌飛廉而太息登平陽而懷傷棄衡石
而意量兮隨風波而飛揚陟九嶷而臨截薛聽涇渭之波聲陟隴山以
踰聖眇然覽於八荒覽天地之幽奧兮統萬物之維綱馮衍顯志賦

上隴阪陟高岡游精宇宙流日八紘歷觀九州山川之體追覽上古得
失之風疆理九野經營五山眇然有思陵雲之意馮衍自論

趨蜀道履黃牛因覩江山之勝亂石排空驚濤拍岬歛巨石於江中崔
嵬嶺岫列作三峯平治泔水順遵其道非神扶助於禹人力奚能致此
耶僕縱步環覽乃見江左大山壁立林麓峯巒如畫熟視於大江重複
石壁間有神像影現焉髮鬢鬚眉冠裳宛然如綵畫者前豎一旌旗後
駐一黃犢猶有董工開導之勢古傳所載黃龍助禹開江治水九載而
功成信不誣也諸葛孔明黃陵廟記

每念昔日南皮之遊誠不可忘既妙思六經逍遙百氏高談娛心同乘
共載以遊後園清風夜起悲笳微吟樂往哀來愴然傷懷 昔日遊處
行則連輿立則接席每至觴酌流行絲竹竝奏酒酣耳熱仰而賦詩當

此之時忽然不自知其樂也 追思昔遊猶存心目既痛逝者行自念也 魏文帝與吳質書

崇山隱天幽林穹谷陸海珍藏藍田美玉商洛緣其隈鄠杜濱其足倚高臺之曲隅處幽僻之閑深望翔雲之悠悠羗朝濟而夕陰信有心而在遠重登高以臨川 曹植幽思賦

去峻溪之鴻洞觀日月之朝陽釋叢棘之餘刺踐檀林之柔芳皦玉粲以曜日榮日華以舒光 劉禎遂志賦

知諸君子復有漳渠之會西有伯陽之觀北有曠野之望高樹翳朝雲文禽蔽綠水沙場夷敞清風肅穆是泉臺之樂也得無流而不返乎 應

與蒲公
談書

建安十年始定冀州歲貊貢良弓燕代獻名馬時歲之春勾芒司節和風扇物弓燥手弱草茂獸肥與兒子丹獵於鄴西手獲獐鹿九狐兔三十 時游錄

魏應璩與從弟曹書間者北遊喜歡無量登芒濟河曠若發蒙風伯

掃涂雨師灑道按轡清路周望山野亦既至止酌彼春酒接武茅茨涼過大厦扶寸肴脩味踰方丈逍遙陂塘之上吟味菀柳之下結春芳以崇佩折若華以翳日弋下高雲之鳥餌出深川之魚蒲苴替善便嫗稱妙何其樂哉雖仲尼忘味於虞韶楚人流遯於京臺無以過也班嗣之書信不虛矣未還京都塊然獨處營宅濱洛困於囂塵思樂汶上發於寤寐昔伊尹輟耕邳擘投竿思致君於有虞濟蒸民於塗炭而吾方欲執耒於山陽沉緡於丹水知其不如古人遠矣然山雨不貪天地之樂曾參不慕晉楚之富亦其志也

諸葛亮造八陣圖於魚復平沙上壘石爲八行相去二丈桓溫征譙縱見之曰此常山蛇勢也文武皆莫識吾常過之自山上俯視百餘丈凡八行爲六十四絕絕正圍不見凹凸處如日中蓋影及就視皆卵石漫漫不可辨甚可怪也 東坡志林

衛洗馬玠初欲渡江形神憔悴語左右云見此茫茫百端交集苟未免有情亦復誰能遣此 世說

王司州胡之至吳興印渚中看歎曰非唯使人情開滌亦覺日月清明
袁彥伯宏爲謝安南奉司馬都下諸人送至瀨鄉將別旣自悽惘歎曰
江山遼落居然有萬里之勢世說

簡文入華林園顧謂左右曰會心處不必在遠翳然林木便自有濠濮
間想也不覺鳥獸禽魚自來親人世說

林公見東陽長山曰何其坦迤世說

顧長康從會稽還人問山川之美顧云千巖競秀萬壑爭流草木蒙籠
其上若雲興霞蔚世說

左據函谷二嶠之阻表以秦華終南之山右界褒斜隴首之險帶以洪
河涇渭之川華實之毛則九州之上腴焉防禦之阻則天下之奧區焉
王子敬云從山陰道上行山川自相映發使人應接不暇若秋冬之際
尤難爲懷 王子敬自會稽經吳聞顧辟疆有名園先不識主人徑往
其家值顧方集賓友酣燕而王遊歷旣畢指麾好惡傍若無人世說
明帝問謝鯤君何如庾亮荅曰端委廟堂使百僚準則臣不如亮一丘

一壑自謂過之世說

撫軍問孫興公自謂何如曰託懷玄勝遠詠老莊蕭條高寄不與時務
經懷自謂此心無所與讓也世說

陳林道遠在西岍都下諸人共要至牛渚會陳理旣佳人欲共言折陳
以如意拄頰望雞籠山嘆曰孫伯符志業不遂世說

支道林因人就深公買印山深公荅曰未聞巢由買山而隱世說

桓公入洛過淮泗踐北境與諸僚屬登平乘樓眺矚中原慨然曰遂使

神州陸沉百年丘墟王夷甫諸人不得不任其責世說

衡州石鼓山據蒸湘之會江流環帶最爲一郡佳處石鼓書院記

松江漁翁者不知其姓名每棹小舟游長橋往來波上扣舷飲酒酣歌
自得嘗曰養志者忘形養形者忘利致道者忘心心形俱忘其視軒冕

如糞土耳高士傳

阮光祿在東山蕭然無事常內足於懷有人以問王右軍右軍曰此君
近不驚寵辱雖古之沉冥何以過此世說

游名山記
王右軍與謝安石書
吾素志無廊廟王丞相欲內吾誓不許之手跡猶存由來尚矣不於足
下參政而方進退自兒婚女嫁便懷向子平之志數與親知言之非一
日也 王逸少荅殷深源書

坐而獲逸遂其宿心比常與安石東遊山海願養閑暇之餘欲與親故
時共歡宴街孟引滿語田里所行故以為撫掌之資其為得意可勝言
耶常依依陸賈班嗣之處世老夫志願盡於此也 王右軍與謝安石書

知彼清晏歲豐又所使有無鄉故是名處且山川形勢乃耳何可以不
遊目足下今年政七十耶知體氣常佳此大慶也 想復勤加願養五年
垂耳順推之人理得爾以為厚幸但恐前路轉欲逼耳以爾要欲一遊
目汝嶺非復常言足下但當保護以俟此期勿謂虛言得果此緣一段
奇事也 王右軍與周益州書

省足下別疏凡彼土山川諸奇楊雄蜀都左太冲三都殊為不備悉彼
故為多奇益令其遊目意足也可得果當告卿求進少人足耳至時示
意遲此期真以日為歲想足下鎮彼土未有動理耳欲及卿在彼登汶

嶺峨眉而旋實不朽之盛事但言此心以馳於彼矣 同上

蜀中山水如峨眉 山夏含霜電碑板之所聞崑崙之伯仲也 王右軍與謝安石書

衡山九疑沅湘千里九向九背乃不復見 湘中記

鏡湖澄澈清流瀉注山川之美使人應接不暇 王獻之書

此二日東行遊步園中已極有在家湖行模也 姊想觸亦小有可散 謝

尋水望山率情便去抱琴引酌興盡而返

居家大都無所為正以番綸為事足以末日北固山下大有鱸魚一手
釣得四十九枚 謝玄暕兄書

此間萬頃江湖撓之不濁澄之不清而百姓投一綸下一筌皆奪其魚
器不輸十疋皆不得放不知漆園吏何得持竿不顧漁父何得鼓枳而
歌滄浪也 王胡之與庾安西書

吾童稚之年已懷遠畧弱冠託廬山事釋和尚遊道餐風二十餘載淵
匠既傾復與汝曹歸耕先隴山居谷飲忽復十年及今未老尚可厲志

成西歸之津梁自今以往家務大小一勿見聞 雷次宗與子好書

自山陰至臨安多有金堂玉室仙人芝草左元放之徒漢末諸得道者皆在焉許玄與王羲之書

潘子憑軾西征自京徂秦牧疲人於西夏携老幼而入關越平樂過街邠秣馬臯門稅駕西周澡孝水而濯纓嘉美名之在茲登嶠坂之威夷

仰崇領之嵯峨臯託墳於南陵文違風於北阿躡函谷之重阻看天險之衿帶發闕鄉而警策遡黃巷而濟潼眺華岳之陰崖覲高掌之遺蹤

寶鷄前鳴甘泉後涌面終南而背雲陽跨平原而連嶠嶕九峻截辟太一巖從南有玄灞素澆湯井溫谷北有清渭濁涇蘭池周曲浸決鄭白

之渠漕引江淮之粟林茂有鄠之竹山挺藍田之王爾乃階長樂登未央汎太液凌建章徘徊桂宮惆悵栢梁潘岳西征賦

過武昌以逍遙登樊山以流盼訪遺老以證往乃西鄂之舊縣曩有吳之初基升員丘而豹變爾乃出桑落會通川背彭澤而長泉洲渚迢迢

巖岫虛懸卽雲似嶺墜水若天日月出乎波中雲霓生於浪間袁宏東五月洛浦之遙遙浮黃川之裔裔遵河出以悠遠觀通流之所會啓石門

而東縈汭汭渠其如帶越河山而託景眇四載而遠期陸機行思賦

赤城霞起而建標瀑布飛流以界道濟楸溪而直進落五界而迅征跨穹隆之懸磴臨萬丈之絕冥踐莓苔之滑石墀壁立之翠屏過靈溪而

一濯疏煩想於心胸凝思幽巖朗詠長川孫綽遊天台賦衡山有二峯極秀一峯名芙蓉峯最爲竦傑自非晴霽之朝不可望見

峯上有泉飛派如一幅絹分映清林直注山下盛弘之荊州記歲大荒之孟夏余將往乎蜀都朝發軔于京宇夕予宿於穀洛踐有周

之舊墟杞丘荒以廖廓讚王孫於北門問九鼎于東郭入函谷而長驅歷新安之鹵阜行逶迤以登降陟二嶠之重阻經欽岑之險巖想姬文

之避雨出潼關以迴逝仰華岳之崔巍勤大禹之疏導豁龍門以洞開緣阻岑之絕崖蹈偏梁之懸閣石壁立以切天岌嵒隗其欲落造劍閣

之崇關路盤曲以掩藹山崢嶸以峻狹仰青天其如帶張載述行賦巖下老人者不知何許人漢武帝南巡狩過潯陽詔舉逸民時老人澹

然處於巖下左右強以應詔老人曰堯仁如天孤雲自飛一水一石臣

之樂也帝曰卿不願仕耶曰束身王朝其如北山之雲何南康志

或命巾車或棹孤舟既窈窕以尋壑亦崎嶇而經丘木欣欣以向榮泉

涓涓而始流善萬物之得時感吾生之行休又云懷良辰以孤往或植

杖而耘耔登東臯以舒嘯臨清流而賦詩陶潛歸去來辭

仰承發止已次新林三相與區九疑形勝加以夏石奇雲秋江迥月翰

飛紙落理豐辭富賞未興餘時希逮憶陸景與從兄安成王書

仰承縱賞山中遊心人外往而忘返有會昔言牽物從務無由獨往仰

此高蹤寸心如結晉安王答廣信侯書

果歸期於願言獲素念於思樂於是舟人告辦佇楫在川背海向溪乘

潮傍山時旻秋之杪節天既高而物衰林承風而飄落水鑒月而含輝

發青田之枉渚逗白岍之空亭停余舟而淹留搜縉雲之遺迹漾百里

之清潭見千仞之孤石謝靈運歸途賦

聞惡道溪中九十九里有五十九灘王右軍遊此惡道歎其奇絕遂書

突星瀨於石謝靈運與弟書

會境既豐山水是以江左嘉遯竝多居之但季世慕榮幽棲者寡或復

才為時求弗獲從志至若王弘之拂衣歸耕踰歷三紀孔淳之隱約窮

岫自始迄今阮萬齡辭事就閑纂成先業浙河之外棲遲山澤如斯而

已既遠同義唐亦激貪厲競殿下愛素好古常若布衣每意昔聞虛想

巖穴若遺一介有以相存真可謂千載盛美也謝靈運與廬陵王義真書

山川之美古今共談高峯入雲清流見底兩岸石壁五色交輝青林翠

竹四時俱備暗霧相歇猿鳥亂鳴夕日欲流沉鱗競躍實是欲界之仙

都自康樂以來未有能與其奇者陶弘景答謝中書書

褚先生從白雲舊矣古之逸人或留慮兒孫或使華陰成市而此子索

然惟明松石介於孤峯絕嶺者積數十載近故要其來此冀慰日夜比

談討芝桂借訪荔蘿若已窺烟夜臨滄洲矣王僧達答丘珍孫書

登北山遠眺衆美都盡光武墳邊杏甚美今送核朱超與兄書

僕去月謝病還覓薛羅梅溪之西有石門山者森壁爭霞孤峯限日幽

岫含雲深溪蓄翠蟬吟鶴唳水響猿啼嚶嚶相雜綿綿成韻既素重幽

居遂葺宇其上幸富菊花偏饒竹實山谷所資於斯已辨仁智所樂豈徒語哉

吳均與顧章書

故鄣縣東三十五里有青山絕壁千尺孤峯入漢歸飛之鳥千翼競來企水之猿百臂相接秋露為霜春蘿被徑信足蕩累願物娛衷散賞

與施從事書

自富陽至桐廬一百許里水皆縹碧千丈見底游魚細石直視無礙急湍甚箭猛浪若奔夾峯高山皆生寒樹負勢競上互相軒邈爭高直指十百成峯泉水激石泠泠作響好鳥相鳴嚶嚶成韻經綸昔務咸窺谷忘返矣

吳均與朱元思書

性同鱗羽愛止山壑眷戀松筠輕迷人路縱宕巖流有若狂者忽不知老至而今鬢已白豈容課虛責有限魚鳥慕哉

宗測答豫章王書

蹲林卧石藉卉班荆不過田畷野老漁父樵客酌醴焚枯嗚嗚相勞藜羹含糗果然滿腹誅高梧而賦修竹背清淮而遊長范留東閣以從容

石室而高視

王僧儒答江琰書

三峨高出五岳秀甲九州震旦國第一山也

西竺千歲和尚與行脚僧書

始得優游山林之下縱心孔釋之書觸興為詩凌峯採藥服餌蠲痼樂有餘也但不與足下同日以此為恨耳

帛道猷與道壹書

貧道棲荆累稔年衰疹積厭毒人喧所以遠託岷界卜居斯阜抱郭懷邑迴望三方負巒背岳遠矚九流以去年四月創功覆篋輒疏山讚以露愚抱

玄暢與傅琰書

蕭子褰帷九水作牧三宮乃盱衡而言曰將遊目於五湖夕結覽於姑蘇臨閭門之跨水聳重闕而開都張素蓋而縈洲嶼馳白馬而赴江沱登舜橋而延首瞰禹井而淹留御史之牀猶在督護之門不修登釣臺而高邁過鄂渚而西浮臨章華而留盼見舊楚之淒涼試極目乎千里何春心之可傷

梁元帝玄覽賦

夙有尚於清靜叨再入於鄢郢東窺文命之穴南望鴻崖之井對灌木之修聳觀激水之飛奔聞賓鴻之夜飛想過沛而沾衣况登樓而作賦聖淮海而思歸

梁元帝言志賦

廬山者雖林石異勢而雲霞共色長風暴作則萬流俱響晨聽曉吟則百嶺齊應東瞻洪井識曳帛之在茲西望石梁見指寶之可拾梁元帝游廬山序

聖隆中之大宅映峴首之沉碑遂經秦而至洛覺高蹈之清遠見風雲之倏爍何武關之狹隘而漢祖之英雄去青泥而踰白鹿越澹水而至青門長卿之賦可想邵平之迹不存咄嗟驪山之阜惆悵灞陵之園訪軼道之長組拾藍田之璵璠登未央之北闕望長樂之南址伊太后之所居築旗亭而成市槐路鬱以三條方塗阻而九軌傍直城而北轉臨橫門而左起指咸陽而長望何李趙之經過息甘泉而避暑猶爽愷而清和沈烟歸魂賦

唐王績醉鄉記醉之鄉去中國不知其幾千里也其土曠然無涯無丘陵阪險其氣和平一揆無晦明寒暑其俗大同無邑居聚落其人甚精無愛憎喜怒吸風飲露不食五穀其俗于其行徐徐與鳥獸魚鼈雜處不知有舟車器械之用昔者黃帝氏嘗獲游其都歸而杳然喪其天

下以為結繩之政已薄矣及堯舜作為千鍾百壺之獻因姑射神人以為道蓋至其邊鄙終身太平禹湯立法禮繁樂雜數十代與醉鄉隔其臣羲和棄甲子而逝箕臻其鄉失路而道天故天下遂不寔至于末孫桀紂怒而昇其糟丘階級千仞南向而望卒不見醉鄉武王傳于世乃命旦立酒人氏之職典司五齊拓土七千里僅與醉鄉達焉三十年刑措不用下逮幽厲迄于秦漢中國喪亂遂與醉鄉絕而臣下之愛道者往往竊至焉阮嗣宗陶淵明等十數人竝游於醉鄉沒身不返死葬其壤中國以為酒仙云嗟乎醉鄉氏之俗豈古華胥氏之國乎何其淳寂也如是余將游焉故為之記

宋鮑照詩吾自發寒山而全行日少棧石星飯結荷水宿以今食

時僅及大雷塗登千里日踰一辰去親為客如何如何向因步頓憑觀川陸遶神清渚流睇方曛東顧三洲之隔西眺九派之分闕地門之絕景望天際之孤雲南則積山萬狀爭氣負高含霞歛景參差代雄陵跨長隴前後相屬帶天有匝橫地無窮東則則隰亡端靡際寒蓬夕卷古

樹雲平旋風四起思鳥群歸靜聽無聞極視不見比則陂池潛演湖澤
脉通棲風之鳥水化之蟲以智吞愚因疆捕小號噪驚聒紛切其中西
則迴江末指長波吞合滔滔何窮漫漫安竭左右青藹表裏紫霄從嶺
而西氣盡金光半山以下純爲黛色信可謂神居帝郊鎮控江漢者也
夕景欲沉曉露將合孤鶴寒嘯游鴻遠吟樵蘇一嘆舟子舟泣誠足憂
悲不可說也

鴈蕩山自古圖牒未嘗言山頂有大池相傳爲鴈出石下二潭爲龍湫
山南有芙蓉峯下有芙蓉驛西竺經諾矩羅尊者居震旦東南大海際
山以鳥名村以花名懷素與律公書

按九真圖越裳四十里杉谷古崇山竹谿從道明國來於崇山北二十
五里合水欹缺藤竹明昧有三十峯夾水直上千餘仞諸仙窟宅在焉

沈佺期從崇山
向越裳詩序

太行之陽有盤谷盤谷之間泉甘而土肥草木叢茂居民鮮少或曰謂
其環兩山之間故曰盤或曰是谷也宅幽而勢阻隱者之所盤旋友人

李愿居之

韓文

烟駕不逢羽人長往去驚世走青雲登玉女之峰窺石人之廟見司馬
子微馮大和霓裳渺然冥壑獨立真朋羽會金漿玉液則有楊仙公玄
默洞天賈上士幽棲牝谷玉笙吹鳳瑤裝駐鶴陳子昂真誥

僕去年秋始游廬山到東西二林間香爐峰下見雲水泉石勝絕第一
變不能捨因置草堂前有喬松十數株修竹千餘竿青蘿爲牆垣白石
爲橋道流水周於舍下飛泉落於簷間綠柳白蓮羅生池砌大抵若是
每一獨徃動彌旬日平生所好者盡在其中不惟忘歸可以終老白樂天與

元徽
之書

夫曹官絃冕者大賢處之若游青山卧白雲逍遙偃傲何適不可小才
居之窘而自拘悄若桎梏則清風朗月河英嶽秀皆爲棄物安得稱焉
所以名教樂地無非得俊之場也李白集

唐王維山中與裴迪書近臘月下景氣和暢故山殊可過足下方溫經

猥不敢相煩輒便往山中懋感配寺與山僧飯訖而去北涉玄灞清月

映郭夜登華子岡朝水淪連與月上下寒山遠火明滅林外深巷寒犬
吠聲如豹村墟夜春復與踈鍾相間此時獨坐僮僕靜默多思曩昔攜
手賦詩步仄逕臨清流也當待春中草木蔓發春山可望輕儵出水白
鷗矯翼露濕青皋麥隴朝雉斯之不遠儻能從我遊乎非子天機清妙
者豈能以此不急之務相邀然是中有深趣矣無忽因賦黃蘗人往不
一山中人王維白

唐法象志天下山河之象存乎兩戒北戒自三危積石負終南地絡之
陰至濊貊朝鮮謂之比紀天所以限戎狄南戒自岷山嶓冢負地絡之
陽至東甌閩中謂之南紀天所以限蠻夷河源曰北河由北紀首達華
陰與地絡會又分而東流與涇渭濟瀆相表裏江源曰南河自南紀首
達華陽與地絡會又分而東流與漢水淮瀆相表裏觀兩河之象與雲
漢之終始而分野可知矣

天下山分爲四條上應二十八宿中州負險用武之國四戰用文之國
負海貨殖所阜之國

北紀東至北河北爲邢趙南紀東至南河南荆楚自北河下流南距岱
山爲三齊夾石碣石爲北燕自南河下流北距岱山爲鄒魯南涉江淮
爲吳越此負海之國也天原發微

見蒼梧塗山則思舜禹恤民之艱觀窮荒大漠則悟秦漢勞師之弊覽
齊墟晉壤則想桓文勤王之霸觀洞庭荆門則知苗蜀恃險之敗呂溫地誌

序

李太白錢一翁尋桃源序昔祖龍滅古道嚴威刑煎熬生人若墜大火

三墳五典散爲寒灰築長城建阿房并諸侯殺豪俊自謂功高羲皇國

可萬世思欲凌雲氣求仙人登封泰山風雨暴作雖五松受職草木有

知而萬象乖度禮刑將弛則綺皓不得不遁於南山魯連不得不蹈於

東海則桃源之避世者可謂超升先覺夫指鹿之儔連頸而同死非吾

黨之謂乎二翁耽老氏之言繼少卿之作文以述大雅道以通至精卷

舒天地之心脫落神仙之境武陵遺跡可得而窺焉問津利往水引漁

者苑藏仙谿春風不知從來落英何許流出石洞來入晨光盡開有良

田名池竹果森列三十六洞別爲一天耶今扁舟而行笑謝人世阡陌未改古人依然白雲何時而歸來青山一去而誰往諸公賦桃源以美之

河東吾土也家世遷徙莫能就緒其間有大河條山氣蓋關左吾因翹翹褰裳奮懷舊都平泉山居戒子孫記

茲岳殊於衆山經綸中外上秩乾門黑帝之宮下捺坤軸玄神之府豈止磅礴截幽燕拒洪河撐大海瀕洞合沓半天下之襟帶峩峩巖巖一字內之標格者也張嘉貞恒山碑序

廬山者江陽之名嶽也背岷流面彭蠡蟠根亘數百里又曰重嶺桀嶭仰挿雲日伏滔游廬山序

乘興踏月西入酒家不覺人物兩忘身在世外李太白書

元豐六年十月二日夜解衣欲睡月色入戶欣然起行念無與樂者遂至承天寺尋張懷民懷民亦未寐相與步於中庭庭中如積水空明水中藻行交橫蓋竹栢影也何夜無月何處無竹栢但少閑人如吾兩人

耳寓惠錄

又在江湖不見偉人前在金山見滕元發乘小舟破巨浪來相訪出船巍然使人神聳卧游錄

洛陽古帝都山川風氣清明盛麗居之可樂平川廣衍東西數百里嵩山少室天壇王屋岡巒靡迤四顧可挹伊洛瀍澗流出平地故其山川之勝泉流之潔雖其閭閻之人與公侯共之一晦之宮上矚青山下聽流水奇花修竹布列左右而其貴家巨室園圃亭觀之盛實甲天下東坡

今日游白水地跡山山上布水三十仞雷輶電散大畧如項羽破章邯時也東坡

元豐三年夏六月過廬山涉其山之陽入棲賢谷谷中多大石岌業相倚水行石間其聲如雷霆如千乘車行者震掉不能自持雖三峽之險不過也故其橋曰三峽渡橋而東依山循水水平如白練橫觸巨石匯爲大車輪流轉洶湧窮水之變院據其上游右倚石壁左俯流水石壁之跡僧堂在焉狂峯怪石翔舞於簷上杉松竹箭橫生倒植葱蒨相糾每大風雨至堂中之人疑將壓焉問於習廬山者雖茲山之勝栖賢蓋

以一二數矣 卧游錄

白鹿舊游恍然夢寐但聞五老峯下新泉三疊頗為奇勝計此生無由得至其下嘗託黃商伯陳和成摹畫以來摩娑素墨徒以慨嘆也 文公

秋潦方漲水面千里 出房心開風露浩然獨與兒子邁棹小舟至赤壁西望武昌山峯蒼翠未蒼然雲濤際天 東坡

遐想山林之勝他處真未易得令人悵然興懷也 與葉未卿諸人書

白鹿知亦嘗一到其善其善每念疇昔相與登臨遊從之樂未嘗不發

於夢寐 游廬山題名云晦翁與程正思丁復之黃直卿俱來覽觀江山之勝樂而志歸時淳熙己亥重午日翁男在甥魏恪侍行

山間勝處皆有前賢題詠可尋獨新泉近出最名殊勝非三峽漱石所

及而余未之見黃石巖絕高而漱王之原眼界特曠遠余嘗一詣而不能及近聞故吏張生棄家居之老守益有愧焉 朱文公送甘叔懷遊廬山序

五日下午至東西林兩寺相去不百步一溪清駛橫貫其間皆自方丈

前廊廡下過他處所無有也白蓮池在東林法堂前白公草堂基在寺

東久廢近歲復創數楹制殊狹陋然亦非其正處矣 朱文公山北紀行

余自得石林山樂其泉石欲為藏書之所且携數僕夫荷鍾持畚平夷

澗谷搜剔巖竇雖風雨不避旁勸皆以為甚勞而余實未嘗倦殆其役

於物耶 葉夢得樂壽堂記

懸溜分流以飛湍七嶺重標而疊勢峭門百尋峻閣千仞香鑪吐雲以

像烟甘泉滴溜而先潤 宋支曇諦廬山賦

胡寅嘗與劉兼道游武夷山兼道善吹鐵笛有穿雲裂石之聲寅詩曰

更煩橫鐵笛吹與衆山聽 武夷山志

慈湖陳氏草堂瀑流出兩山間落於堂後如懸布崩雪如風中雲如羣

鶴坐於南軒對修竹數百野鳥數千

田畫字承君陽翟人剛介自守兄弟五人望出繼伯父後盥仲觀粹中

巨元邈皆有氣節博學能文家居兄弟相從能自樂也與崔鷄德符陳

恬叔易為友諸田兄弟在陽翟縣南十里竹林店居其地多竹故名竹

林店有屋十數間文史足用陽翟人張宗文秀才與諸田親戚自言頃

年自城中月夜步謁諸田適值酒熟花方盛開留連十許日商確文字

意足而後歸

宋馬子才贈蓋邦式子長遊予友蓋邦式嘗爲予言司馬子長之文章有奇偉氣切有志於斯文也子其爲說以贈我予謂子長之文章不在書學者每以書求之則終身不知其奇予有史記一部載天下名山大川壯麗可怪之處將與子周遊而歷覽之庶幾可以知此文矣子長生平喜遊少年自負之時足跡不肯一日休非直爲景物役也將以盡天下大觀以助我氣然後吐而爲書則其平生所嘗遊者皆在焉南浮長淮沂大江見狂瀾驚波陰風怒號逆走而橫擊故其文奔放而浩漫墜雲夢洞庭之陂彭蠡之瀦混爛虛呼吸萬壑而不見介量故其文停瀟而淵深見九疑之芊絲巫山之嵯峨陽臺朝雲蒼梧暮烟態度無定靡曼綽約春粧如濃秋飾如薄故其文妍媚而蔚紆泛沅渡湘吊大夫之魂悼妃子之恨竹上猶有斑斑而不知魚腹之骨尚無恙者乎故其文感憤而傷激北過大梁之墟觀楚漢之戰場想見項羽之喑鳴高帝之慢罵龍跳虎躍千兵萬馬大弓長戟俱遊而齊呼故其文雄勇猛健使人心悸而膽慄世家龍門念神禹之魏功西使巴蜀跨劍閣之鳥道上

有摩雲之崖不見斧鑿之痕故其文斬絕峻拔而不得攀躋講業齊魯之都覩夫子之遺風鄉射鄒嶧彷徨乎汶陽洙泗之上故其文典重溫雅有似乎正人君子之容貌凡天地之間萬物之變可驚可愕可以疑心使人憂使人悲者子長盡取而爲文章是以變化出沒如萬象供四時而無窮今於其書而觀之豈不信矣子謂欲學子長之爲文先學其遊可也不知學遊以采奇而欲操筆弄墨綉綴腐熟者乃其常常耳昔公孫氏善舞劍而學書者得之乃入於神庖丁氏善操刀而養生者得之乃極其妙事固有殊類而相感者其意同故今天下之絕蹤詭觀何以異於昔子果能爲我遊者乎吾欲觀子矣醉把盃酒可以吞江南吳越之清風拂劍長嘯可以吸燕趙秦隴之勁氣然後歸而治文著書子畏子長乎子長畏子乎不然斷編敗冊朝吟而暮誦之吾不知所得矣去歲與子野游逍遙堂日欲沒因並西山叩羅浮道院至巳二鼓矣煉惠州近城數小山類蜀道春與進士許毅野步會意處飲之且醉作詩以記適參寥專使欲歸使持此以示西湖之上諸友庶使知余未嘗一

日忘湖山也

東坡

今春在都下嘗到龍山周覽舊游未免室邇人遠之嘆尤衰寄江道錄

行李至山中便有登臨之樂豈與奔走塵埃中者同味耶然老夫於此

興復不淺山中有新作不惜時見寄也

黃山谷刀筆

閑居多病人事廢絕遇風日晴暖從門生兒姪輩扶杖逍遙林麓山水

之間忽不知日月之成歲

山谷

宋廬襄西征記予嘗謂人生以七尺男子軀為天地中最靈物造物者剖裂元氣取其精英而與之使呼吸至和發露天光超然出於塵垢之外苟甘心瓶罌如醯雞然老且死是造化棄物爾寧不媿古人以桑弧蓬矢射天地四方而示其有志哉予欲長遊遠睇窮極天下壯麗奇偉卓絕之處南窮滄溟北抵幽都東折若木之枝西奄濛汜之谷頂摩太清轍環八埏以助夫造物所以與予者生抱此志二十三年矣更念衢為小邦處會稽姑蔑之地山川形勝不足為天下偉觀居常病是不足廣吾胸中之氣思得隨穆滿造父輩齊驅並馳於瑤池之宮閨風之苑

亦欲乘雲御風於日月出沒之際煙霞歛散之表況宇宙中可足跡至者邪故過洞庭彭蠡之浩漫太行孟門之巖崿豈不知不修德而恃險者終啣壁而來歸者乎過岷峨王壘劍閣棧道之險豈不知不保國而貪利者終為亡國之虜乎過塗山思神禹會諸侯之盛尙有專車之骨枕荒草而淒淒者乎過瀟湘思二妃望九疑之雲尙有琅玕之上帶淚痕而斑斑者乎過嶠函而思秦以虎狼之強而自為楚齒也過烏江而思項羽以拔山之力而卒為漢擒也登泰山梁父尙有秦皇漢武之函玉檢金篆石刻之書可讀也過朔庭王關尙有投筆書生伏波將軍燕然銅柱之蹟可復也過謝家青山而不知今日尙有佳士能為蒼生持起者乎過卧龍南陽而不知今日尙有抱膝長嘯以邀三顧之寵者乎凡天下之奇形異狀陣雲回馬之峯浮天浴日之波與夫通衢大邑遐邦異壤之遠周遊歷覽以廣吾胸中之氣豈不洋洋然浩浩然足以吞雲夢而飛天池哉去年秋舉郡計鄉老里大夫推予為冠今年求試春官擔簦裹糧走數千里雖風俗形勢不出吳越江淮之近而山川之勝

槩前賢之遺蹟亦已多矣因談笑之暇姑記其所遊之畧尚有遺賞未
出於車輪馬足之間者缺之以藏諸楮中云吳越之地牽牛織女之分
野秦伯句踐之故墟有鑿山煮海之利三江五湖之險亦江東之都會
也獨衢東接甌閩西連婺女至新安曰睦州歛三江之水會合於亭下
有山隆然直壓其首如渴鰲怒鯨奮迅鬣鬣奔而衝水之狀上有桐君
祠乃戴顓飛仙之地祥氛瑞氣氤氳回薄鶴駕往矣靈蹤儼然自桐君
祠而西有羣山蜿蜒如兩蛇對走於平野之上三江之水並流於兩間
驚波鬪馳秀壁雙峙上有東漢故人嚴子陵之釣臺孤峯特操聳立千
仞奔走名利汨沒爲塵垢中客者一過其下清風襲人毛髮爲豎使人
有芥視功名之意自釣臺而西曰浙江羣水赴焉衆山截焉海門二峯
屹然孤立頃聞巨聲轟嶺驚裂地軸如雷霆之奔擊萬軍之決怒天吳
爵躍水怪萬狀擁銀山而瀉天漢意其子胥之冤尚含屬鏤之怨怒而
激爲此乎抑江神海若以謂不如是不足以震天地之威乎抑形勢使
然而自爲此奔突乎竊悲子胥之忠腸義骨感激發憤欲身存國家讒

鋒射人卒詆誅死真天下奇男子有不幸者如此也自浙江艤舟古岬
下登其上曰杭州橫控列城爲國大藩乘熊軾而建隼旟者必王公大
人非州刺史郡太守常二千石比也觀閩商海賈舟車輻湊犀貝魚鹽
駢羅其中龍山據其首西湖盤其腹天隱聳其臂胥丘卧其背樓臺上
下如錦繡圖披髮文身者閩粵之舊俗也水犀射手者戰國之餘勇也
金堤王渠虛臺廣榭者錢氏之故基也霓裳羽衣綽約靡曼者蘇小之
遺態也故過其地者必駐軾焉自杭而西至嘉禾曰秀州自秀而西登
吳江橋如長虹欲舒橫截水面左瞰太湖一望千里篙工柁師風謳雨
吟征人動江鄉之悲游女弄採蓮之歌思昔拂袖去國扁舟五湖者鷗
夷子之遠遊也蓴羹半糝鱸魚自香者張季鷹之思歸也行歌長吟興
屬雲水者陸魯望之嘉遯也後人高之作祠堂於笠澤之右予登三賢
之堂悅三賢之風自吳江橋而西至姑蘇曰蘇州予求其所謂姑蘇臺
者有遺址存焉父老尚能言之曰今天祐我宋統一寰宇四方遠近無
敢據土地擁甲兵效戰國醜髀相依者是臺也今雖版籍入于王府亦

亡國之餘辱使當時知范蠡之有謀悟句踐之嘗膽俯取忠言却西子而不顧斬宰詔以謝三軍則江山之王氣猶存而東門之懸睛不抉矣言訖涕數行下予亦悵然而悲自姑蘇至毗陵曰常州自常州至京口曰潤州謁水府祠渡揚子江登金山見巨浪拍天鯨鯢出沒蜃樓駕空朱碧相照呼雲吸霧一息萬態紛紛紆紆不可名狀遂泐揚子江至儀真曰真州見江臯有巍然古宇長廊復壁間有所謂小龍之祠試造觀之有小蛇盤旋几案上朱鱗火髯目赫赫有異光尸祝指曰此非虻蝮蟒蝎之儔伍也喜則俯首搖尾僅可玩弄稍怒則搖撼坤闔翻海摧岳而後已所以艤舟而禱者袂相屬焉自儀真至維揚曰揚州自維揚至山陽曰楚州至淮陰登韓信廟使人扼吭太息思昔帶長劍游五陵俛首出惡少年跨下氣帖帖然不敢喘何其弱也及其登壇佩大將軍印虜魏豹滅項籍斬成安君泚水上名動諸侯南面稱孤又何壯也觀其用兵制勝神授鬼畫出入古兵法中言取楚三策如指諸掌何其智也烏盡弓藏兔死狗烹雲夢之擒未幾而死於婦人之手又何其愚也大

丈夫抱超世絕俗之才負安時經濟之畧顧用不用何如耳自淮陰出龜山泛長淮入汴口曰泗州觀青蓮寶宇連榭曲榭雄視耽耽以窮土木之壯麗浮圖屹立若柱擎天委珍貝絕毛血騰踏道路動以萬計亦靈德旃幪於民而歸依乞憐者如是多也更念汴水者出於崑崙黃河之源濁浪奔馳自上而下與淮俱流數千里間清濁異色久則與俱如涇渭然遂念隋大業間煬帝所以浚關使達于揚州者不過事游幸爾柰何錦帆未張而神器移膏血未乾而生民瘡天怨神怒假手于唐龍舟鳳楫鼓枻而回者不其無聊哉今則東南歲漕上給於京師者數千百艘舳艫相銜朝暮不絕蓋有害於一時而利於千百載之下者天以隋爲吾宋王業之資也遂上所謂黃金堤與友生對坐古柳下感今悼昔自泗州抵宿州歷南京至雍丘乃張許二公保障江淮之地也昔胡羯梟鳴腥我嵩岱哆然四顧有橫吞天下之志二公提孤兵挫強虜扼東南咽喉以江淮財用濟中興非古烈士夫疇能哉吾見其悲風擊地林木怒號意者南霽雲之喑鳴也古木蒼瘦怪石孤聳意者雷萬春之

壁立也殘陽滿地餘霞一抹則愛妾之血肉尚在也寒鴉悲鳴林鳥爭
飛則侍童之精魂猶存也自雍丘至陳留乃漢張子房所封之壤也觀
其以經世之畧出為王者師躡帝足而封韓信迎四皓以定太子功成
名遂翻然從赤松子游可謂豪傑之士矣使當時僥倖一擊之勝以不
貲之軀填餓虎口是與軻荆聶政朱亥郭解輩同為匹夫勇矣烏能垂
光虹蜺哉然而悠焉遐鶩脫軒冕如弊屣則其所得有大過人者不知
絕粒茹芝挹朝霞而餐之果能却老而不死乎所謂黃石公者吾意其
隱君子尚得從而游乎又不知圯下兵符之書尚無恙乎鄙夫漢庭之
臣其心鼎鑊視死而不顧胡不謝去朝市而從子游也自陳留至大梁
曰汴州始禹畫為豫周封為魏邲鄘之始都楚漢之戰場今為開封府
是謂京師也思昔戰攻之初壯士之悲吟戰馬之嘶風九江舞陽按長
劍而叱咤之地今則萬國之朝會集焉昔之鋒鏑交加兩虎並隅而相
睨棘門刁斗羅黃戟而擁千刃以備掩襲之虞者今則萬方之王帛赴
焉昔之荒蹊斷塹猩鼯狐兔之窟宅朝風號而暮雨悲今則龍樓鳳

閣正玉繩而方紫極焉昔之白葦蕭蕭有螭頭馬鬣之象過其下者莫
不酸鼻出涕今則龍池鳳沼集水戲而競娛樂焉以至虞韶夏濩犧琴
瑤鐘者太常作也神虬龍馬氍毹龜貝者異方貢也天球河圖赤鴈白
魚者瑞物賓也丹禁紫宇格熊裂驅者上林樂也黑鞘鐵脚突騎勇也
虎翼龍驤戰士躡也飛廡連榭居人繁也輦金蒙玉大賈至也樓櫓相
望雉堞新也法象穹極帝門隆也鴈行鷺列百官入也龍墀日角天王
朝也環流積餼置博上而列羣書則庠序之設嚴也重研負笈起草萊
而叩帝閣則羣賢之樂而來游也至於其餘不可殫記雖班孟堅二京
之筆左太冲三都之才揚子雲五柞之手與夫芝房寶鼎之作歌金馬
碧雞之馳辯不可得而窮矣當使曳裾金馬門下出入承明廬中厠迹
於賢公卿大夫之列庶幾觀朝廷之制作稔祖宗之故事尚能賦之覆
甿甃貴紙價詎可必哉

宋王深源卧游錄敘太史東萊先生晚歲卧家深居一室若與世相忘

而其周覽山川收拾人物之意未能已也因有感於宗少文卧游之語

每遇昔人記載人境之勝輒命門人隨手筆之而目之曰卧游錄非直以爲怡神玩志之具而已嘗遺益國周公書曰近書新街時初投毫譙州明道宮沛真源恍然在目若更十年不死則嵩之崇福究之太極華之雲臺皆可卧遊也觀此則先生故國之念未嘗一日去心卧遊之意抑又深遠矣此書未及成編而已迫夢奠後二十餘年先生之從子喬年既取卧游二字扁先生燕寢之堂復以是編屬東陽郭君淇書之且屬深源識其顛末深源曩待大愚先生見先生之愛玩是書也因請刻之祠中以惠同志觀者儻自得之庶幾遺意之尚可追也

宋洪景廬西山亭記

天地發育萬物孳成于西故名山川多西今夫所謂瑤池崑崙閬風玄圃日月之所避隱神仙之所窟宅正在流沙弱水外中州指爲西故其扶輿英淑之氣渙而宅之雖一巖壑一硯臺地無中邊亦莫不爾杭漢汝陰之西湖洪蜀水之西山嘉之娥眉巴陵岳陽之樓黃之臨臯金陵之賞心白鷺揚之平山吳之蘇臺茂苑荆楚之雲夢郢之白雪滁之瑯琊九江之庾樓皆延庚挹辛賓夕陽而導初月校

奇品勝於登臨最宜

嶺南氣候不齊吾嘗云菊花開時乃重陽涼天佳月卽中秋不須以日月爲斷也今歲九月殘暑方退旣望之後月出愈遲然予嘗夜起登合江樓或與客遊豐湖入栖禪寺扣羅浮道院登逍遙堂逮曉乃歸杜子美云四更山吐月殘夜水明樓此殆古今絕唱也寓惠錄

紹聖二年三月四日詹使君邀予游白水山佛迹寺浴于湯泉風于懸瀑之下登中嶺望瀑所從出出山肩輿却行觀山且與客語晚休于荔浦之上曳杖竹陰之下時荔子纍纍如芡實矣父老指以告予曰是可食公能携酒復來乎意欣然許之寓惠錄

登州蓬萊閣上望海如鏡面與天相際忽有如黑豆數點者郡人云海船至矣不一炊久已至閣下東坡

熹少疎懶書史之外酷好山水今得爲吏廬阜之下其山林泉石號爲東南最勝固已私愜所願而去歲勞農山間又得所謂白鹿洞者溪山邃密林樾茂美尤有幽絕之致文公與尚書劄子

宋不羈陳振伯三書

晉王右軍聞成都有漢時講堂秦時城池門屋樓

觀慨然還想欲一遊目其與周益州帖蓋所致意焉近時呂太史有宗
少文卧遊之語凡昔人紀載人境之勝爲一編其奉祀毫社也自以爲
譙沛真源恍然在目視究之太極嵩之崇福華之雲臺皆將卧遊之噫
嘻孤矢四方之志高人達士之懷古今一也顧南北分裂蜀在境內雖
遠患不往爾往則至矣毫充嵩華視蜀猶爾封也欲往其可得乎然則
太史之情其可悲也已予近得此記手寫一通與東京記長安河南志
夢華錄諸書並藏而時自覽焉是亦卧遊之意云爾

趙季仁謂余曰某生平有三願一願識盡世間好人二願讀盡世間好
書三願看盡世間好山水余曰盡則安能但身到處莫放過耳大抵登
山臨水足以觸發道機開豁心志爲益不少季仁曰觀山水亦如讀書
隨其見趣之高下

鶴林王露

家藏太白墨蹟六字又太白象耳山留題云夜來月下卧醒花影零亂
滿人襟袖如濯魄於冰壺也此帖在雅州郡齋未知今存否然皆不可
得見今觀其詞超出物表要自是太白口中語他人不能道也又樓虛

月白秋宇物化于斯憑闌身勢飛動非把酒自忘此興何極此亦太白
語也

見胡文穆廣雜著

余往年讀劉玄靖山栖志見所載紫岩靈岩勝槩分明如畫時正當

暑不覺涼颼生肘腋間何文定公跋其志有云想玄靖一時飛屐上

下千峯紫翠間左浮丘而右洪崖其風致猶前日也

浦陽人物志

荆州記載鹿門事云龐德公居漢之陰司馬德操宅州之陽望衡對宇
歡情自接泛舟寰裳率爾休暢記沮水幽勝云稠木傍生凌空交合危
巖傾岳恒有落勢風泉傳響於青林之下巖猿流聲於白雲之上遊者
常苦目不周玩情不給賞記三峽水急云朝發白帝暮宿江陵凡一千
二百餘里雖飛雲迅鳥不能過也

丹鉛餘錄

余與會稽胡公謐聯舫北上次吳門酌昆陵菊酒雨滯朱方涉江登蜀
岡以眺隋煬陳迹歷歷在目爲太息者久之乘月帆颺社湖越呂梁宿
彭城挹二蘇之芳風渡閘沂濟沿衛河以趨平原歌吟亂棹謳揮洒趁
帆蔭日以是爲樂

楊守陳集

趙栗夫與余談浙中山水之勝云瑤華洞最佳君往必宜游之後余至
杭牽於公事但得到西湖上諸山及天竺靈隱而已然亦一認即歸不
復能得其味所謂瑤華洞者竟負君言不得游余可謂俗客矣

楊循吉

關中山蓋著於南山歷慶率荒漠堆埼坡陀不可名紀惟平涼有崆峒
臨洮有烏鼠積石河外有葱嶺崑崙斯古之名紀然崑崙固弗可睹矣

雍大記

水竹之間結一茅菴題曰面壁啜粥茹蔬以送昏曉無日不在是間也
携家南來汎錢唐登草坪度分水嶺入閩游武夷諸峯徘徊歸宗巖皆
滿向來山水之願宿痾老態恨此行太晚也

輕舟軟輿上下山水間如在畫圖不知身是遷客也入閩尤勝大都丹
厓碧潭隨處而有至於橫嶂絕壁倚天卓立白雲英英卷舒其下剗削
點綴疑有神工鬼斧不可名狀每每忘返

清明時節樓船簫鼓行江南道中亦復奇勝三月三日渡江過儀真從
陸抵環滁雨中望醉翁亭甚適自此渡淮泗遡黃河登太行陟上黨涉

沁橫汾入晉陽即日將出鴈門入雲中歷覽長城之塞帥諸生較射慨
然有北向燕然之志每當意會處未嘗不念東濱同之出巡將及千里
往返山川有極佳者大率太行西麓爲山西萬山中得一平曠有水處
便立州縣城堞外四面皆山真所謂萬疊雲屏也五臺尤靈恠而長松
喬木高下森矗如虬龍肩輿只行樹稍也六月湏挾纈都無暑氣尚欲
抵雲中觀漢武五將軍出塞之地上醫巫閭然後南還耳

夜歸宿山中晨起觀初日散影遙田滿地皆白雲以軟輿經過瀟漫霖
霖俯見城郭此身真在天上湏臾扁舟亂流如汎瀛洲還坐商榮映從
兒子寫漢書一兩段方啜新稻飯一盃此樂恨不與東濱共之往時看
海月宿百菊亭扁舟短服出沒浦雲荻花間與知己者奕棋飲酒比一
思之恍如隔世

山居新作榭在玉華之巔昨乘月登之殊有異境

棧道劍閣瞿唐巫峽水陸極天下之至險而寔亦天下之至奇

俱儼山集

溪上從游樂甚於今不忘自歸田廬取倡和之什觀之意未嘗不在仙

華山水間也天下山川可翫者多而可喜者少天下之士鄙陋者多者少人之所遇役於事者多游乎物外者少聚而兼有三者其溪上之游乎

道出剡中行崇山絕壑間煙姿霧氣環擁疊出爛若霞錦東南之奇觀也乃知靈運泰者良有所為恨不得與執事同之俱遜志齋集始與親友別離憂慮盈心翹首縱目雖暫為披豁而竟不能攬擷奇勝與所游者相頡頏於編翰間以此愧古人耳

四月七日至長安又半月至寶鷄由寶鷄渡渭始入山歷棧道凡十日以閏月一日抵漢中離家至此一百二十四日水陸幾千里蒙被國恩例得舟車與妻子輩幸免徒步之勞途中過虎牢嶠函潼關之壯瞻華嶽終南太白之秀觀周秦之故都弔賢君哲士之陵墓循漢祖就國之故道追惟一時俊傑奇謀雄烈令人慨然而思惻然而感忘乎所經之險所之之遠也第恨病餘才思拙澁不能悉見諸詠歌以發胸中之所蘊以是慚負古人耳 方正學與盧希魯書

當其適意時或携筇陟崇嶺看雲起卧石林聽泉瀑聲久則大笑而別

學士序記

吾嘗絕江淮而北行登泰山而望之四方矣昔之英雄豪俊高車大纛馳騁乎名都壯邑之中田夫巷婦嘖嘖隨而瞻望之以為人神者皆是百年以來唯見斷碑殘壘狐狸窟而烏鳶號其上豈非借之於造物者復歸之冥漠之中乎 借竹軒記

尚語山靈待我東歸尚當約同志重游因歷覽海上諸山以盡宇宙之大觀其樂蓋未艾也 俱中山草堂記

濯大江以滌胸中之塵觀名山以窮天下之壯 上蜀王牋

大江之南衡嶽之東山之名者以百數博大雄奇吾得廬山焉 桑喬廬山疏

踰浙江以東多大山東南極海上尤秀絕其最著天台四明鴈蕩天姥皆穹窿嵒峻為天下奇觀

十五六時侍父北游濟上歷齊魯之故墟覽周公孔子廟宅求七十子之遺跡問陋巷舞雩所在慨然有願學之志嘗在郡城會集林張陳四

君子登巾山絕頂縱談千古竟夕不寐自以此樂乃蘇子瞻死後三百年所無也方正學事狀

明王泰游名山記 吾少也有四方之志思欲如司馬子長縱游天下以大吾觀及官侍從地近職親雖燕南諸山未獲數至焉今茲告歸謂可如志而耄及之雖吳中諸山未及徧游焉靜言思之蓋未嘗不以爲嘆玄敬乃能以使事聘四方旣月終南之巔過首陽挹夷齊之高風登華山弔希夷蛻函登嵩山憇少林寺濯驪山溫泉入王屋扣司馬子微之扃三門砥柱龍門伊闕皆極天下壯觀近如兩京畿甸諸山皆遐探邃討搜奇抉怪而又能以文字發之讀名山記雖不識其地若身至其地者可謂善游而能言者矣然吾與玄敬約如天之福假我以年吾方與子比游長江觀廬山瀑布浮沅湘上岳陽樓望衡岳窺瞿唐三峽歷劍閣岷峨入關中覽秦漢故都還登秦岱慨想七十二君之遺封南出武林觀湖江湖上會稽探禹穴佇子陵釣臺歷天台雁宕至武夷欸羅浮上韶石望蒼梧九疑而還子肯從吾游乎雖然太湖有山焉是爲洞

天福地願子先之

明徐禎卿重與獻吉書 僕以攝提格之歲仲春南徂出齊魯之郊經淮沛之墟直視平原蕭條千里于時雉雉於野麥秀油油瞻日月之勤感東山之嘆雖昏眇傷神未足以振心而惕慮也旣而道指東吳彷徨故都棲棲焉若仲尼之去魯也乃遵錢唐薄眺會稽控湖山以爲郭環江海以爲池昔日神宮嶢闕椒房綺榭之餘或歸然於魯甸徒彷彿於丘夷顧瞻周道不能不爲之興哀也傍引桐江之谿遡泖富春之渚豈惟望風而思其人抑可以樂焉而終其身矣又西南行渡穀水陟常山越餘干沿弋陽山谿澗沚之濱玉水澄澈則有參差之毛丹碧之石遊儵翔沫白鳥棲止可以瑩神而悅心也橫涉彭蠡仰瞻廬嶽其波濤則騰涌奔伏噴薄日月其峯嶂則盤迴峭絕亘接霄漢香爐五老之形瀑布青峽之觀特爲卓詭靈芝異草彌山布谷金符玉冊窮幽極玄信赤霄之神都老氏之玄宮也又西溯九江南望全楚與夫扼巴蜀之喉舌據吳會之上流通五嶺之門戶接雍梁之要樞此其大勢也若乃鎮以衡

陽之阜表以武當之山五峯森拔三門凌啓雲霞絢繪紫氣燭耀其中
四候蚤暮七曜運行往往與人間殊別爰有黃金之堂白玉之祀琉璃
爲鋪檀桂爲柱制侔天居勢轍海嶽目所希見窈窕難說又有江漢之
波沅湘之流洞庭之湖雲夢之澤千條萬派混原同塗縱貫脉理經帶
其間極望浩漫際天薄海陽春獻而百草芳涼風至而兼葭落猿子噉
嘯鴻鴈成羣魚龍倏忽暘晦互分可以觀天地之變化驗時序之榮悴
也故徵水族之饒萃材木之珍論舟楫之利及畋魚之樂九州之內未
有踰於此者也然其民俗苦瘠尚利薄義戶無困廩之食人無相固之
心雜以山夷輕躁易動非久安長治之國又其山川包絡四要固用武
之場聚爭之地也故東望樊口則慕周瑜之雄西顧峴山則感叔子之
惠載觀荆門則悲昭烈之績極眺中原則痛武穆之忠山河昔是人物
已非心傷嘆矣悽其漣如嗟乎死生命也理亂時也命有矣而志無涯
時可溝而身不逮此屈原所以流亡於江夏賈誼所以憂傷於長沙者
也所賴豪賢發憤映帶礪以垂名章縫樂道假竹帛以昭志生人之業

庶爲不朽耳僕自惟無卓犖之材寡礪錙之用進不揚眉於天下退不
能甘心於一壑徒放情於江海之間抗志於宇宙之表將以搜竒獵秘
咀華納靈則水土而函蘊法景曜以摛文聊希子長之風庶幾虞卿之
志乃知干役之云豫茲遊之豈徒哉惟是足下與吾同懷遭時齟齬良
圖弗遂抱膝空林之中棲神窮跡之境雖槍榆之爲樂固知大鵬之逍
遙也故聊述其畧以當抵掌方有簿牒不盡所言

明唐寅中州覽勝序

吾黨袁臣器少年氣逆温然王暎蓋十室之髦懿

也弘治丙辰五月忽詔然理篙楫北沂楊子歷彭城漸于淮海抵大梁
之墟九月來歸乃繪所經歷山川陵陸并衝隘名勝之處日夕展弄目
游其中予忝與鄉曲得藉訪道里宛宛盡出指下蓋其知之素而能說
其詳也予聞丈夫之生剡蒿體揉柘幹以麗別室固欲其遠涉遐舉不
齷齪牖下也而愿慙者懷田里沒齒不窺闥閤曰世與我違其與菑木
委灰同棄雖有分寸而人莫之知也后世因莫之建白也是余固欲自
展以異而頽然青袍掩脛馳騫士伍中而身未易自用也雖然竊亦不

能久落落于此臣器新從魏地來今不知廣陵有中散之遺聲歟彭城
項氏之都也今麋鹿有幾頭歟黃河故宣房之基在否歟大梁墟中有
持盂羨爲信陵君祭與無也臣器其爲我重陳之余他日當參驗其言
見本集

知章一代異人天機卓絕不入名法轍迹而放意縱適超詣縣解無道
心蓬塊至於風情所寄托於言者則妙絕玄奧浩浩乎放乎南溟不知
其津涯所際也當時所見者知晚年尤縱誕無復規檢極飲狂肆豈知
道假顛頡者亦自有本來制度者元和己亥知章已百年矣往來會稽
武夷吳興山水間以藥爲市人賴以濟祖貫嘗於天台授其斷穀丹經
其論有理非常時道家流所說也貫得其術九十六年而言知章猶在
世間然則誠得仙矣 廣川畫跋

蘇子瞻志林有三江味別之說蔡傳深非之然以禹貢本文論之揚江
言三江旣入而於經言江漢朝宗於海則同流而自爲道可知矣許敬
宗謂濟入河泆地南出亦以味別以今揚子江心有南零北零之異則

知其入而不合正不疑也古有五行之官水官得職則能辨其性味潛
而後出合而更分皆可辨之故師曠易牙俞兒張華王劭陸羽張又新
劉白芻李季卿品天下之水性味不同蓋古水官之遺法豈獨爲口腹
哉蘇子之說蓋本於此味別之說恐不可廢况蔡氏於後章之傳亦性
別鹹苦之說何獨怪蘇子哉

又考郭緣生述征記緣生於河上遇一書生問之曰何知濟與河上源
不異物之不同猶鉛錫也比濟旣入於河性與河別不能合混滲漉入
地泆行而溢爲滎爾今之歷下發地悉是流水濟所過也東阿之井濟
所溢故今阿膠上濁住吐下膈疎痰正以性趨下清而且重故治於濁
逆上之病譬如油之與水固不同情九夏之辰冷熱之風亦各爲隊豈
必謂無水過水哉涇渭分曹南北異零此理不少鄭樵謂山過山則分
水過水則合世無山過山水過水之理謂漢入於江其文止此有脫文
況入於河其文亦止於此而溢爲滎之上當更有導泆水數句說經不
通不以爲脫必以爲誤此書生之竺疾也慎嘗闢其說云山過山則分

雖分而性不分如羅浮二碣以風雨而合離蓬萊兩山隨波濤而上下
玄中記云名山有孔竅相通是也水過水則合雖合而性不合沈括云
水以漳名者從水於章章者別也文也謂兩物相合有文章可別也清
漳濁漳合於上黨當陽者沮漳合流也潁上者章貢合流也鄆郡者西
江合流也毫漳者漳渦合流也雲夢者漳鄆合流也凡此數處皆清濁
合流色理如螭螭又數十里如璋璋者判合之器也白公問於孔子曰
以水投之何如孔子曰淄澠之味易牙能知之斯固味別之說也蔡氏
之譏蘇子亦過矣

或問余水味之說則詳矣水性之別何如曰班固司馬遷貨殖傳地理

志備矣論其極則庭州灞水金鐵皆漏庭州灞水在大荒之外以金鐵

夷山中有流酈延之川日夜脂流酈延安石油也以爲煙墨松脂不及

水亦如之陽弱水弱毛黑溪玄髓南荒黑有溪水其水以塗水象至輒不去崑崙

塵弱水弱毛黑溪玄髓兒以塗身即能乘象如家畜古所謂黑崑崙崑今

之象悉唐制角畔怯腐手見佛水性不同有如此者學所以貴博物也

司馬子長自敘云上會稽探禹穴此子長自言徧遊萬里之目上會稽

總吳越也探禹穴言巴蜀也後人誤解遂言禹穴在會稽按蜀之石泉
縣禹生之地其石沓深人跡不到古碑有禹穴二字李白所書也古人
作文決不重複如禹貢曰雲土夢作又雲在江南夢在江北以五言而
括千餘里又曰蔡蒙旅平蔡在雅州蒙在雲南亦四字而括千里餘蔡
沉等繆云蒙在雅州誤矣

潞有東潞西路西路今山西潞州東潞今北京潞河潞有南潞北潞北

涪琅琊靈門南涪在九疑零陵雲夢有南夢北夢見左傳註俱丹 錄

羅咸嘗受薦使西域由汴道秦入巴蜀出納口歷滇池逾乾崖緬里之

地又轉而之陰山過古輪臺放靈州抵瓜州縱觀先代遺跡乃歎曰子

長之遊不過是也於是沿朔涉代遵幽薊畧燕趙而歸作西遊錄凡山

川人物花木鳥獸與夫土地所宜風俗所尚靡不畢識羅氏族譜內傳

崑崙天下山之頂也迺天下山之至高處山之起勢處其東面中原也

所以江淮河濟水皆東流也其西面西域諸國也自流沙以西水皆西

流也南自吐蕃兩廣水皆南趨也北即沙漠又天下岡脊至高之處直

存名已 恩錄名言 二六

北虎林至海都木鉢子田地地勢又逐漸而低水皆北流南視陰山之
地反為極南之境矣以此觀之地形如一亭子中高而四方下崑崙乃
其結頂處四下之簷乃四方之國土考其流水可見必皆會同於四海
草木子

三月辛丑同徐靖國至愚溪過羅氏脩竹園入朝陽洞蔣彥回陶介石
僧崇廣及余子相步及余於朝陽巖裴回水濱久之有白雲出洞中散
漫洞口咫尺欲不相見山谷集

天水張茂先南昌黃魯直弟叔向建中靖國三年丁卯同來時新雨晚
晴同登鍾閣觀白塩之崇峒想少陵之風流歎大雅之不作徘徊久之

山谷題固
陵寺碑

朝奉郎新當塗守黃庭堅於崇寧元年四月丁未來謁叔元晚登秀江
亭澄波古木使人得意於塵垢之外蓋人閑景幽而奇絕耳山谷集
韓城元聿雙井黃庭堅同游石門霜清木落山川高明掃選上冠雲可
以忘歸山谷石門寺題名

楊億至道中知處州與李起居書郡齊迥在霄漢石磴盤曲策馬征登
嵐靄滴衣烟霞滿目

余往歲登山臨水未嘗不諷詠王摩詰輞川別業之篇想見其人如與
並世黃山谷集

歐陽率更鄱陽帖亦翰墨中異人也繫舟樊口蕭散於寒溪西山之上
携此書往來研味髣髴見古人山谷別集

周走數千里外踰閩嶠泝劍川竝朝陽南海之涯出東嶺下已乃浴章
貢奏廬陵道淦水以望豐城繇撫信衢嚴入于吳中少留錫山冢舍航
漕渠瞰浙江之濤窺禹穴徑剡谿循天台路以還五六年轍跡半天下
山行野宿登高望遠慨然想見古人而尚友於千載鴻慶集

唐李太白周覽四海名山大川一泉之旁一山之阻神林鬼冢魑魅之
穴猿狖所家魚龍所宮往往游焉故其為詩踈蕩有奇氣鴻慶集

去年夏中因飲滁水甚甘問之有一土泉在城東百步許遂往訪之乃
一山谷中山勢一而高峯三面竹嶺回抱泉上舊有佳木一二十株乃

天生一好景也遂引其泉為石池甚清甘作亭其上號豐樂亭亦宏麗
 又於州東五里許靈溪上有二恠石乃馮延魯家舊物因移至亭前廣
 陵韓公聞之以細芍藥十株見遺亦植於其側其他花竹不可勝紀山
 下一徑穿入竹篠蒙密中豁然路盡遂得幽谷歐陽永叔與梅聖俞書
 承諭以嵩山之游豈勝跋羨此樂常為山人處士得之衣冠仕宦比其
 汲汲得如其志不老則病矣雖有登臨之興勉強而為之已不勝其勞
 也若神完氣銳惟意所適如公之樂者百無一二人也歐陽永叔與郭
 彭城佳山水魚蟹爭訟寂然盜賊衰少聊可藏拙寓居去江無十步風
 濤烟雨曉夕百變江南諸山在几席此幸未始有也東坡與司馬溫公
 詩編多寫洞庭君山境物讀之超然神馳於彼矣所居臨大江望武昌
 諸山如咫尺時復乘舟縱游其間風雨雲月陰晴蚤暮態狀千萬恨無
 一語畧寫其髣髴耳東坡簡上官長
 遷居江上臨皇亭甚清曠風晨月夕杖屨野步酌江水飲之想味風義
 以慰孤寂東坡與朱康叔

廖山人一日過予秦冠楚服飄飄乎塵

埃之外予乃挈之由金阜出石岫泛韓江上流登玉華東西兩峰之絕
 頂俯瞰巨海晚而休于獨松之廬時皓月初出山虛夜靜少飲披衣共
 步以石擊廬左投龍洞中若有神物哮嗥之聲相與驚恠不敢復回廬
 側遂尋舟順流而下泊于越王走馬埒下山人謂予曰子游江湖升廊
 廟日談月評得乎山川之名文物之英當為予第之予曰天壽之山龍
 翔鳳舞自天而下其旁諸山則玉帶軍都連亘環抱銀山神嶺羅列拱
 護勢雄氣固以莫皇圖鍾山龍蟠石城虎踞颯颯乎大江之險汪汪然
 彭蠡之湖地控三山洲分白鷺惟茲形勝寔南北之兩都者次則太華
 少華芙蓉明星鴻門之坂長平之坡漆沮水涇河渭河四塞之國關
 中輿區太室少室嶢嶢之瀆左伊右瀍昔河沂洛嶽崑函嶠天壇王屋
 偉哉周南中華之域太白之山大明之湖三觀岱宗二門天啓石閭梁
 父云云亭亭憑山負海臨漳枕津太公用之而富管氏資之以興蒙羽
 東峙鉅野西馳尼阜鍾靈泗源萃氣乃玄聖之所生實速肖之闕里及

夫祝融紫蓋之蜿蜒君山洞庭之吞吐金焦京口之竒天目吳越之秘
青城玉壘雲烟之外匡廬厭原星辰之裏五羊之羅浮八閩之武夷若
斯者皆韞乾坤之精英萃萬有之神竒吾子亦曾盡得千載未探之玄
而間可泄之機歟山人起而謝曰是乃宇內之大觀吾微夫子之言幾
何不為損彈於栗林而墮於虞人所諄之地耶乃相視撫掌大笑不覺
江靄斂晴東方向曙矣遂別去

間與二三友携酒壺出由白鹿城登華蓋山持盃浩歌聲振林木或擢
短舫具笭簪垂綸於江水中或呼小奚奴相隨行吟夢艸堂上詩句不
逼古人不欲休當其適意時乾坤空濶竟不知榮辱之代遷而寒暑之
往來也 宋學士集水北山居記

孟秋避暑靈山宮七日甫至見山峰峭拔滴泉飛流越夕雲霞爭變風
雨橫天亦竒矣山房橫入半石為題與木石居四字終日靜坐清風灑
然 近菴殘稿

禹曰天下名山經五千三百七十山六萬四千五十六里 心地也言其

五臧蓋其餘小山甚衆不足記云天地之東西二萬八千里南北二萬
六千里出水之山者八千里受水者八千里出銅之山四百六十七出
鐵之山三千六百九十此天地之所分壤樹穀也戈矛之所發也刀鋸
之所起也能者有餘拙者不足封於太山禪於梁父七十二家得失之
數皆在此內是謂國用 山海經

穆王享王母于瑤池之上賦詩往來辭義可觀遂襲崑崙之丘遊軒轅
之宮眺鍾山之嶺玩帝者之寶勒石王母之山紀跡玄圃之上 郭璞山海經序

穆王駕八駿之乘右服盜驪左馱騶耳造父為御韓戎為右萬里長騫
以周歷四荒名山大川靡不登濟東升大人之堂西燕王母之廬南躡
鼇鼉之梁北躡積羽之衢窮歡極娛然後旋歸 同上

怡然長咲脫去十洲三島相期拾瑤草吞日月之光華共輕舉耳 東方朔與友人書

望聞烏氏有龍池之山微徑南通與漢相屬其旁時有竒人聊及閒暇
廣求其人 方望辭隗囂書

比嘗與安石東游山海并行田視地利願養閑適衣食之餘欲與親知
時共懽讌雖不能興言高詠銜杯引滿語舊里所行故以為撫掌之資
其為得意可勝言耶 王羲之與謝萬書

余別業在輞川山谷其遊止有孟城坳華子岡文杏館斤竹嶺鹿柴木
蘭柴茱萸泝宮槐陌臨湖亭南坨歌湖柳浪藥家瀨金屑泉白石灘比
坨竹里館辛夷塢漆園椒園等與裴迪閑暇各賦絕句云爾

晉習鑿齒登萬山與謝安書曰西望隆中想卧龍之吟東眺白沙思鳳
雛之聲南眷城郭懷羊公之舊風北臨楚墟存鄧老之高蹤游目檀溪
念崔徐之交肆覽漁梁追二公之迹若乃裴杜和傅之故居繁欽王粲
之舊宅遺事滿目 襄陽耆舊傳

仰承縱賞山中游心人外往而忘返有會昔言牽物從務無由獨往仰
此高蹤寸心如結 梁簡文帝答廣信侯

暮春美景風雲韶麗蘭葉堪把沂川可浴盡游玩之美致足樂耶 梁簡文答

湘東王書

性愛山泉頗樂閑曠雖復服膺堯門情存魏闕至於一丘一壑自謂出
處無辨嘗願卜居幽僻屏絕喧塵傍山臨流面郊負郭而王畿陸海畝
號一金涇渭土膏豪傑所競此園左帶平湖修陂千頃右臨長薄清潭
百仞前逼通陌朝夕爽塏後望鍾阜表裡煙霞每騰春迎夏華卉競發
背秋向冬雲物澄霽歸瞰戶牖不異登臨升降塔墀已窮歷覽 張續謝東堂齋園啓

據虎之岫川途不遙翔鷺之濤風煙相接必願振忍辱之衣赴翹勤之
望 王暕與智聚書

虎丘山者吳嶽之神秀者也雖復峻極異於九天隱磷殊於太乙衿帶
城傍獨超衆嶺控統川澤頤絕群岑若其峯崖刻削窮造化之瑰詭絕
澗杳冥若鬼神之髣髴珍木靈草瓊林碧葉飛禽走獸茂義膺仁是以
歷代高賢輕舉栖托梵臺雲起寶刹星懸自非王牒開祥金精蘊耀豈
其神怪若此者乎 張種與沈炯書

三江五湖洞庭巨麗寫長洲之茂苑登九曲之層臺山高水深雲蒸霧

吐其中之秀異者實虎丘之靈阜焉冬桂夏栢長蘿修竹靈源秘洞轉側超絕遠澗深巖交羅戶穴

沈炯答張種書

周游名山看望八海回翔五嶽休息洞室樂林草之垂條與鳥獸而相

激川瀆吐精立陵翁鬱弋釣長流遨游玄籟靜心山岫念真養氣

滄子別蘇林

始得優游山林之下縱心孔釋之書觸興為詩陵峰採藥服餌蠲痾樂

有餘也

帛道猷與道壹書

自到靈溪泰然心意高低峯頂振錫常游石室巖龕拂巾宴坐青松碧

沼明月自生風掃白雲縱目千里名花異果蜂鳥銜將猿嘯長吟遠近

皆聽鋤頭當枕細草為氍世上崢嶸競爭人我心未達方乃如斯儻

有寸陰願垂相訪

朗禪師召玄覺大師山居書

敬想結廬人境植杖山阿林壑地之所豐煙霞性之所適蔭丹桂藉白

茅濁酒一杯清琴數弄誠足樂也

杜之松與王績

入峭峽安居溪伐木溪源幽邃林嶺相映有奇致

陳子昂詩題

司空圖侍郎舊隱三峰天祐末移居中條山王官谷其谷周迴十餘里

泉石之美冠于此山北巖之上有瀑水注流谷中溉良田數頃至今為

司空氏之住宅子孫猶存

賈氏談錄

唐沈佺期峽山賦

峽山寺者名隸端州連山夾江頗有奇石飛泉迴

落悉從梅竹下過渡口至山頂石道數層齋房浴室眇在雲漢神龍二

年夏六月余投棄南裔承恩北歸結攬山隅周謁精舍為之賦焉

贊皇公平泉莊周迴十里構臺榭百餘所今基址猶存天下奇花異草

珍松怪石名品甚衆各為洛陽城族有力者取去唯禮星石及獅子石

今為陶學士徙置梁園別墅

賈氏談錄

是來也余黜於徐州將西居於洛陽汎舟於清冷池泊於文雅臺下西

望高丘東望修竹園入微子廟求鄒陽枚叔司馬相如之故文人立於

廟陞間悲那頌之不作於是者已久隴西李翱太原王涯上谷侯喜實

與同焉

韓愈題李生壁

楚北有山者即禹貢所謂岐東之荆也巖堯高敞可以遠望余簿領之

暇盍嘗游斯俯鏡八川周睇萬里悠悠失鄉縣處處盡雲煙不知悲之

折集也 李矯楚望賦序

山行良佳少留龍門賞雪無遽歸也

錢惟演與謝希深諸君

西北則行陳蔡譙苦與睢汴淮泗出于京師東方則絕江舟漕河之渠
踰五湖並封禹會稽之山出于東海上南方則載大江臨夏口而望洞
庭轉彭蠡上庾嶺繇真陽之龍至南海上此予之所涉世而奔走也蛟
魚洶湧湍石之川巖崖莽林驅虺之聚與夫兩暘寒燠風波霧毒不測
之危此予之所單遊遠寓而冒犯以勤也 魯南豐學舍記

廣陵嘗得明公鎮撫民俗去思未遠獨平山堂占勝蜀岡江南諸山一
目千里以至大明井瓊花二亭此三者拾公之遺以繼盛美爾汝陰西
湖天下勝絕養愚自便誠得其宜 歐陽修與韓忠獻書

宋景文公筆記云仲厄登泰山見七十二家字各不同

春色遂爾藹然草木魚鳥各有佳意廣陵多登臨之美臨風把盞所得
故應不貲 秦觀簡邵彥瞻

臨川山水佳絕別墅又領其高要情思超然獨擅一壑每讀九章想見

其處而以不得從杖履一快洞心駭目之觀以為恨也

孫觀與張右丞

膠西東並海南放于九僊北屬之牢山其中多隱君子可聞而不可見
蘓東坡蓋公堂記

鍾陵舊國故都江山雄竒天下絕境部使者風采震疊百城而有方外
之樂一行作吏豈復有一適如公者乎 孫觀與無為趙守

管子曰凡天下名山五千二百七十

東郡領郡十六而山川瑰竒資中為之甲資中勝游十數而北巖又為
之最 宋京北巖記

棲賢石橋不為混沌氏之所設非工能之開先瀑不可量其高遠奔騰
傾涌若决星漢此充天下之勝處世間不復更有之絕觀也 文與可妙
明審記

嶠南山水竒絕多異人神藥先生不畏嵐瘴可復一游則小人當奉杖
屨以從矣 東坡與劉宜翁

扁舟草履放浪山水間與漁樵雜處往往為醉人所推罵輒自喜漸不
為人所識 東坡答李端叔

鬱孤臺在麗譙坤維隆阜鬱然孤起平地數丈冠冕一郡之形勝而襟帶千里之江山唐李勉為虔州刺史登臨北望慨然曰余雖不及子牟而心在魏闕一也鬱孤豈令名乎改為望闕

新居在大江上風雲變態足娛老人也與毛澤民

雪霽清境發於夢想此間但有荒山大江脩竹古木每飲村酒醉後曳杖放脚不知遠近亦曠然天真與武林舊游未見議優劣也荅士言

胸山臨海石室信如所諭前軾嘗携家一游時家有胡琴婢出又中作濩索涼州凜然有水車鉄馬之聲與蔡景敏

漁游浦陽仙華山問思齊舊游處見其石壁題名尚隱隱可辨故老云思齊與方鳳謝翱無月不游游輒連日夜宋漁吳思齊傳

究心老莊保愛性命江湖乘興漲則不舟雅好雲嶠苔滑磴危鮮不緩却此僕大畧也王廷陳寄余懋昭

班馭既仙東南洞天曼隔塵世羨慕之極不能為情李東陽與王濟之文惠公守臨江首訪先大父王筇隱居適公客何時先生亦自臨川來

會相與入紫霄巖登九仙臺賦凌雲之篇悲歌忼慨聞者悽愴山中人至今傳之曾魯題西臺記後

平生山水稍癖待明年服闋後采藥羅浮訪醫南岳上下黃龍洞嘯歌祝融峯少償夙願陳獻章荅李憲長

秋且盡矣拉何山人駕扁舟出扶胥口東望羅浮鐵橋之勝遂登飛雲訪朱明洞天此其時乎近藁十數錄別紙早晚東游則此紙或可隨行

有至飛雲頂且令從者歌之為我通一語於山靈也與左行人

從上震入四明觀白水尋龍溪之源登杖錫至於雪竇上千丈巖以望天姥華頂若可睹焉王守仁與黃宗賢

久不挹碧梧翠竹之姿時入懷抱鑑湖風月無恙否雲霞出海其樂何如校多病杜門聊以拙自脩時出觀化俯仰宇宙氤氳寥廓欣然會心

物我俱忘虛名在人間世警猶閒雲在天浮漚在海聚散起滅何常之有魏校荅黃起亨

今春長居墓田舊時草堂移入山中數舍四面竹松前通古道可步尋

諸寺後有崇岡，飲食一登南對牛峰石嶺，西望大江，令人灑然忘死。麟
與陳魯南

自抵家，削迹荒村，與野老無別。天下將太平，吾輩耕巖釣海，何適不樂。
秋末天台諸友欲往，少谷遂為羅浮之行，非漫說也。鄭善夫答倪宗正

分當縱放山水間，近者臨安天目，富春巖灘，遠則天姥赤城，一一游之。
陶朱五湖子，長萬里，豈獨昔人耶？九日有客期登碧巖，聞此地有瀑水，
數十丈，殊可觀。公嘗游否？表表復劉司空

鄙人茲歸，請家君倘果五岳之志，則武夷天台之上有丹竈在焉。足下
能早遂初服，僕將遣白龍而候之。浮世紛華已盡，耳目即使白頭于此，
亦何佳况？宗臣報張助甫

金陵多佳麗之地，如牛首諸山，棲霞諸寺，皆號稱殊絕。公暇日曾一臨，
眺否？標品所加，澤及林木，自非巖棲者之比也。近兩經華陰，瞻望三峰，
縹緲煙嵐如在天上，不知公之足跡已嘗一躡其巔矣。誦虎谷費我招，
呼總不聞之句，令人目眩而心怛，豈洞天福地類非分緣淺薄者所能

至邪？朱應登東喬白巖

夫情以物感而心由目暢，非歷覽無以寄杼軸之懷，非高遠無以開沉
鬱之緒。是以騷人發興於臨水，柱史詮妙於登臺，不其然與？李嶠楚望賦序

去國十五年，重游太平堤上，湖山如畫，如夢樹木日以茂盛矣。而知已
益稀，堪以話此者，惟樾岡耳。李立卿

金陵勝地，玄武尤號佳絕。兩岸湖山，蒼翠隱映，領取乾坤生意，透入園
扉。燕笑滿堂，豈復有向隅之泣？惟時王宇澄霽，潦水盡而寒潭清，煙光
凝而暮山紫。此長空與吾掛畫也。天趣逸發，其樂只且。魏校與周伯明書

泰山之上，有日觀峯者，夜半可以眺而見浴日，彌望如鋪金者，海也。綠
色微茫中，有若掣電者，海島溪山相間也。金色漸淡，日輪浮動，水中如
大王盤，適海濱望而見海日，是矣。登天台之巔，曰華頂者，乃知此特小
海耳。諸山環列，外乃為大海。文公嘗同南軒登衡山絕頂，晨起遙見霧
氣在下，若大瀛海，海遠山高者，僅露其頂，有飛動之勢，自謂天下奇觀。
吾嘗以問彭石屋，荅曰：我以為混沌也。太山有日觀者，觀日於未出也。

有月觀者觀月於已沒也長安觀者西望秦間諸山也越觀也者南望會稽諸山也衡山有七十二峯亦有日觀月觀不及泰山者當卯位也長江萬里人言出於岷山而不知元從雪山萬壑中來山亘三千餘里特起三峯其上高寒多積雪朝日曜之遙海晃若銀海杜子美草堂正當其勝故其詩曰窓含西嶺千秋雪正是謂也莊渠書

覽賓之此錄其間在南都時登臨題詠凡崇臺長榭古廟幽亭與乎仙宮佛廬之映帶乎江山者皆予舊所經游而裴徊者也閉目了然殊深東坡龍井之歎吳寬跋李賓之北上錄

始登崑崙峰晚過何山飲僧舍詰朝與客由支硎過禪關度西嶺萬松間遂入天平謁忠烈廟既乃飲白雲泉扣大小石屋望龍門而歸鮑翁集

休寧佳山水縣北松蘿山其勝處不減蘭亭武夷縣西齊雲巖尤其絕與武當相雄長縣東古城巖石門天險庶幾仇池而縣南紋溪之水澄碧如帶沿溪上下石人峯落石臺王几山諸可以登涉釣游處至不可名狀篁墩集

吳中多湖山之勝予數與沈君啓南往游其間尤勝處輒有詩紀之然不若啓南紀之于畫之似也吳寬跋沈周畫

穆天子傳七萃之士生博虎而獻天子命為神而畜之東虢是曰虎牢四嶽三塗陽城太室荆山中南九州之險也是不一姓左傳司馬侯對

博物記曰河東有山澤近鹽沃土之民不才漢興少有名衣冠三世皆衰絕也

古之至人假道於仁託宿於義以遊逍遙之虛食於苟簡之田立於不貸之圃道遙無為也苟簡易養也不貸無出也古者謂是采真之遊東陽記太末縣龍丘山有九石特秀林表色丹白遠望盡如蓮花龍丘菴隱居于此因以為名其峰際復有巖穴外如窓牖中有石林巖前有桃樹其實甚耳非山中自有莫知誰植東漢郡國志註

齊桓公稱曰寡人南伐至召陵望熊山北伐山戎離枝孤竹西伐大夏涉沅沙東馬懸車登太行至卑耳山而還吾欲封泰山禪梁父

揚佺期洛陽記曰河東監池長七十里廣七里水氣紫色有別御監四

面刻如印齒文章字妙不可述

谷口去雲陽宮八十里流潦沸騰飛泉激洒兩岸峭壁孤豎橫盤凜然
疑近每入穴中朱明盛暑當晝暫暄涼秋晚候緼袍不煖所謂寒門
也漢世以爲避暑之處雲陽記

陸魯望云金華山枝峰蔓壑秀氣旁魄不啻神僊登臨

海山微茫而隱見江山嚴厲而峭卓溪山窈窕而幽深塞山童顏而堆

阜聳氏耳

春山淡冶而如笑夏山蒼翠而如滴秋山明淨而如粧冬山慘淡而如

睡郭熙

余書我眉山寺簡板曰奇勝冠三蜀震旦第一山劉東阜云不如以王

右軍崑崙伯仲地易奇勝冠三蜀藝林伐山

東夷有識山川者徧禮五嶽一拜而退惟入關望華山自關西門步步

拜禮至山下而望歎詫七日而去謂京師衣冠文物由此而至唐語

晉王弘之雅好山水始寧沃川有佳山水弘之依巖築室謝靈運顏延

之並相欽重靈運與廬陵王義真牋曰會境既豐山水是以江左嘉

遁並多居之至若王弘之拂衣歸耕踰歷三紀孔淳之隱約窮岫自

始迄今阮萬齡辭事就閑慕戎先業既遠同羲唐亦激貪厲競若遣

一介有以相存真可謂千載盛美也

謝子卧疾山頂覽古人遺書與其意合悠然而笑曰夫道可重故物爲

輕理宜存故事斯忘合宮非縉雲之館衢室豈放勛之堂邁深心於

鼎湖送高情於汾陽嗟文成之却粒願追松以遠遊嘉陶朱之鼓棹

迺語種以免憂判身名之有辨權榮素其無留孰知牽犬之路既寡

聽鶴之塗何由哉山居賦

石傍林而挿巖泉協澗而下谷淵轉渚而散芳岸靡沙而映竹草迎

冬而結葩樹凌霜而振綠向陽則在寒而納煦面陰則當暑而含雪

連岡則積嶺以隱嶙舉峯則羣竦以巖嶭浮泉飛流以寫空沈波潛

溢於洞穴山中兮清寂群紛兮自絕周聽兮匪多得理兮俱悅愒

層臺兮陟雲根坐澗下兮越風穴在茲城而諧賞傳古今之不滅

廣滅景於崆峒許遁音於箕山愚假駒以表谷消隱巖以塞芳萊蒙
庇以織畚皓樓商而頤志卿寢茂而敷誥鄭別谷而未逝梁去霸而
之會高居唐而胥宇臺依崖而穴墀同上

曩余泛舟武昌登盤龍磯以望西山則見長江蜿蜿蜒蜒而來兩峯
秀結嘉樹鬱蒼雲氣冉冉墮山水間令人意興超忽未嘗不想昔游
之勝而嘆九曲之蕪也喬世寧

謝靈運游名山志序曰夫衣食生之所資山水性之所適今滯所資之
累擁其所適之性耳俗議多云歡足本在華堂枕巖漱流者之於大
志故保其枯槁余謂不然君子有愛物之情有救物之能橫流之弊
非才不治故有屈已以濟彼豈以名利之塲賢於清曠之域耶語萬
乘則鼎湖有縱轡論儲貳則嵩山有絕控又陶朱高揖越相留侯願
辭漢傳推此而言可以明矣

元王暉游釣臺詩序至元十六年己丑歲仲冬九日子自桐廬舍鞍鼓
柁取道嚴瀨艤舟祠下登拜遺像肅如也因留詩招隱柱間入客星

閣眺羊裘軒降觀釣臺書院山光叢簇江流有聲若有以回俗駕而
謝逋客也江行有程促之而去回望雙臺顏厚有忸

去秋重蒙提携游仙都洞天好山好水心目一清但恨巖壑深僻處未
得徧歷明年二月間必約重遊窮幽歷險放歌長嘯續徐疑之詩留
爲他日佳話吾兄可葺酒以俟胡深

弘治己酉冬雪寒甚梅不時花獨吾家南山株開特盛未有知者庚戌
二月八日教諭南海劉孟純景文訓導太平黃倫汝彝自下紋溪挈
舟並載徑造花所而友人汪思恭克敬詹貴存中塾師汪尚琳廷貢
先後偕至同倒瓦盆擷園蔬對花大嚼至暮倡爲聯句酌花神而告
之以爲歲歲賞約張本賓主樂甚景文遂放舟下屯溪汝彝與思恭
廷貢還邑中存中還流壙而予獨大醉留宿南山讀騷亭程敏政

秋官主事黃巖施君彥器奉命決獄江南與黃司訓汝彝請予同登雲
巖值雨至陽山寺小酌予以病先歸君及汝彝冒雨而往興奇且健
是日宿巖上相與倡酬甚富明日山下至予家值梅花盛開復爲聯

句三章過南山料理詩裝得二十餘篇天寒歲晏王事倥傯而君厭
飫山水間若不知案牘之勞非其遠識過人殊不及此

程敏政

成化壬寅五月望日予嘗過岑山渡岑山在歙南十五里湖溪中水四

面環之其勢孤絕故師山先生嘗易名小金山山舊有寺曰周流以

人跡罕至移北岸寺堅上人邀予作茶供因留一詩

程敏政

良辰美景尋我同好蔬食菜羹芒屨藜杖披蒙茸踞虎豹登虬龍遇會

意處快飲數觴浩歌一曲大書翠壁之地所復如此以樂吾餘不亦

可乎

羅倫復丘正學

金陵多佳麗之地如牛首諸山棲霞諸寺皆號稱殊絕公暇亦曾臨眺

不標品所加澤及林木自非巖栖者之比也近兩經華陰三峰縹緲

煙嵐如在天上不知公之足跡已嘗一躡其巔矣誦虎谷費我招呼

總不聞之句令人目眩而心怳豈洞天福地類非分緣淺薄者所能

至耶

朱應登與喬白巖

往余客京邸時秋高興發嘗與客遊西山諸寺酌平坡宿香山射獵西

湖之上輒越旬忘歸焉

嵩清集

憶昔正德辛巳八月余舟過潤川弭棹江流醜酒金焦之巔夕風層閣

山若飛動下瞰洪濤鼉鼉出沒信天下奇觀也已酌于甘露寺東望

滄海北眺廣陵烟波混茫無限秋色愧無奇句以寫其勝

同前

憶昔公參藩于汴政事之暇時辱枉顧敝廬劇談清話教益良多自辛

丑春郭園之別歲序荐更忽復千載仰念高風可勝向往今年春三

月始得公去年書札情篤意勤如奉顏色乃謬以鄙人爲可與言者

而商及游覽之事大意謂古人游跡傳諸後世者多羈旅寄寓之士

而仕宦者恒無聞焉惓惓以阮公蓬池吹臺之杜高李爲說吾竊以

爲不然古人杖屨所臨其跡不泯者亦惟以其人之可重言之可傳

云爾而顯融之與漂泊固弗論也昔謝靈運爲東嘉守每遇佳山水

輒留詠如宵濟漁浦潭旦及富春郭揚帆采石華挂席拾海月人至

今誦之嗣爲臨川內史初發石頭城而曰游當羅浮行息必廬霍期

入華子岡而曰且申獨往意乘月弄潺湲遂爲古今佳話謝玄暉爲

宣城太守出新林浦向板橋而曰天際識歸舟雲中辨江樹晚登三
山還望京縣而有澄江靜如練之句迄今膾炙人口夫二子分闢專
城隼旃熊軾豈羈旅寄寓者而杖屨所臨其跡不泯如此矧尤有不
爲二子者乎公行誼醇雅詞翰兩絕苟振衣一出海內名流望風迎
候治具以從願侍几席者當隨地有之不知幾何人公顧憂其被侮
見譏糧不繼而樹遭伐何過計之甚也吾自丙戌免歸杜門不出者
逾二十年乙巳之春遊興偶發漫有河北看山之行聿入王屋陟天
壇濯纓濟池造李愿之盤谷還經寧邑過山陽訊竹林遺蹟迤邐至
六真山尋列仙丹竈揖駕共城登蘇門山酌酒嘯臺之巔循嶺而下
憇孫登土窟邵子安樂窩盤桓旬日興盡而返凡得雜詩暨文若干
首而前巡撫池陽公見以爲奇鉞梓以傳吾欲掩其醜而不可得矣
屬者復擬出游將東登泰山躡日觀坐待鷄鳴眺日出之景下上山
坂觀秦松漢栢及古帝王封禪處停驂曲阜謁闕里廟覽夫子手植
檜問陋巷舞雩所在西游嵩山跨盧鴻巖道遙箕山之陽因弔許由

冢云又欲南游武當諸宮觀玉芝瑤草行或見之便道趨隆中訪諸
葛氏草廬舊址而後歸此區區之夙志也束裝戒發客有阻吾游者
曰古之高賢真逸如陶淵明尚矣然其興之所寄不越乎田園籬落
之間松菊桑麻之畔而已子足跡半天下名山秀水探歷已多勝覽
奇游篇章已富今以遲暮之年而行役靡息似非逸老攝生之道也
吾聞其言異之諦觀其意亦愛我者乃詰之曰汎覽周王傳流觀
山海圖非柴桑翁之詩乎其遠遊之志已畧見於此既窈窕以尋壑
亦崎嶇而經丘非柴桑翁之辭乎而以敖以游亦翁之所不廢也想
其遭時多故日抱隱憂故托諸酒以自晦夫何暇於遠游吾生際昌
期心無它慮得以肆志游覽焉能匏繫一室以自槁乎吾既以是答
客而併以告公抑聞武夷九曲爲天下第六洞天飛泉疊嶂澄徹心
骨寔昔賢棲遁之地公家溫陵去此爲甚邇安得借公往游其間聯
榻紫陽書院夷猶數日面訂昨所論聖門狂簡之學不特攬山水之
奇變縱目於風塵埃壒之表而已公寧無意於茲游乎烏乎人生斯

世合志者希講學論文天壤至樂如朱張南嶽之游伯恭寒泉之會
較諸蓬池吹臺之跡其遠近大小何如也伏冀俯鑒同心裁度期約
則千里盍簪之朋百年麗澤之益不在古人而在吾輩矣豈非逸民
之孤踪斯文之雅集哉飛鴻南來佇聽嗣音李濂答王參政論游覽
山水書

東具名區雅稱偉觀僕性疎野以賞為好先圖陟虎丘之顛泛震澤之
渚訪僚差之宮弔離胥之墓窮搜陳迹下達韋白招要豪傑演繹風

雅勒石紀文傳之百世亦何偉哉顧璘與金仁甫

曉入院署春陽暉暉松枝布庭踈陰晝靜玉河水漣漪與雲光迤邐輕

條出游群鷗上下悠然鶴鳴時復與飛泉雜響此時心清神娛徜徉

忘倦矣屠應峻與呂生

足下講茶巖山松陰擁蓋石流漱玉即酷暑自生涼也孰與不佞苦熱

哉不佞得無妬耶山靈倘不逐客當渡湖上陟山椒掃石趺坐相與

探浮丘訪容成天風冉冉自雲中下也足下獨能斬之乎吳守和簡
范德昭

頃過富春山下維舟徘徊登臺長嘯薄暮清風響籟明月窺人咄咄此

君安能為漢有哉恨不雙吾弟來與客星相揖讓也程滌簡弟

武夷為南國隩區仙遊更多靈異願伯兄乘秋命駕昆當勅山靈擁篲

待之汪道昆書

